


*Ao, Khud Dekh Lo 21*

# **Abadī Zindagī Kaise Pāūn?**



*abadī zindagī kaise pāūn?*

How can I Obtain Eternal Life?

by Bakhtullah

*[A0, Khud Dekh Lo 21]*

(Urdu—Roman script)

© 2024 [www.chashmamedia.org](http://www.chashmamedia.org)

*published and printed by*

Good Word, New Delhi

The title cover is derived from JooJoo41  
<https://pixabay.com/illustrations/man-stairs-heaven-steps-clouds-5826096/>.

Bible quotations are from UGV.

*for enquiries or to request more copies:*

[askandanswer786@gmail.com](mailto:askandanswer786@gmail.com)

## **Fahrist**

<b>Ḳhudā ko Jalāl Do</b>	<b>3</b>
<b>Nūr meñ Chalo</b>	<b>5</b>
<b>Apne Īmān ko Baḡhne Do</b>	<b>7</b>
<b>Pūrā Bharosā Rakho</b>	<b>9</b>
<b>Use Qabūl Karo jo Zindagī Hai</b>	<b>10</b>
<b>Inkār Karne Wāloñ kā Jawāb</b>	<b>17</b>
<b>Injīl, Yūhannā 11,1-54</b>	<b>20</b>

► *Kyā āpne kabhī sochā ki maut ke bād kyā hogā? Kyā main Allāh Ta'ālā ko mañzūr hūngā? Kyā main jannat mein dākhil hone lāyq hūngā?*

Injil-e-sharīf mein hamen iskā sāf jawāb miltā hai ki ham kis tarah abadī zindagī pā sakte haiñ.

Yarūshalam ke qarīb ek gānw thā. Uskā nām Bait-anīyāh thā. Gānw mein do bahnen apne bhāi ke sāth rahtī thiñ. Bahnon ke nām Marthā aur Mariyam the, bhāi kā Lāzar. Tīnon Īsā Masīh ke shāgird the. Wuh use bahut azīz rakhte the. Ek din bhāi bīmār paṛ gayā. Jald hī patā chalā ki yih ām bīmārī nahīñ hai, yih mohlak marz hai. Lāzar kī hālat bigartī gāi to bahnen pareshān ho gāiñ. Ab kyā karen?

Tab bahnon ko Īsā Masīh kā khyāl āyā. Kyā us ke kahne par lātādād marīzon ko shafā nahīñ milī thī?

Kyā wuh madad nahīn karegā? Lekin Īsā Masīh wahān nahīn thā. Wuh dūr, Dariyā-e-Yardan ke pār k̄hidmat anjām de rahā thā. Pahuñchne meñ to ek yā do din lagte the. Shāyad Lāzar utne meñ kūch kar jāe. K̄hūb kahā gayā hai ki ḍūbte ko tinke kā sahārā. Bahnoñ ne ummīd kā yih tinkā pakaṛkar phurtī se ittalā bhejī ki “K̄hudāwand, jise āp pyār karte haiñ wuh bīmār hai.” Donoñ bahnoñ ko ek bāt kā pūrā yaqīn thā: Īsā Masīh hamārī suntā hai. Īsā Masīh hamārī fikr kartā hai. Wuh hameshā hamāre dukh aur sukh meñ sharīk hotā hai.

Jab Īsā Masīh ko yih k̄habr milī us waqt wuh k̄hālī hāth to nahīn baiṭhā thā. Hameshā kī tarah wuh apnī k̄hidmat meñ masrūf thā. Marīz āte-jāte the aur wuh bhīṛ se ghirā rahtā thā.

► *Log kyon uskā pīchhā nahīn chhoṛte the?*

Uskā kirdār aur tālīm anokhī thī. Log sab kuchh chhoṛkar bhāg āte the. Yih ām ādmī nahīn thā. Use k̄hās ik̄htiyār hāsil thā.

Jab Īsā Masīh ko yih ḵhabr milī to us ne farmāyā,

Is bīmārī kā anjām maut nahīn hai, balki yih Allāh ke jalāl ke wāste huā hai, tāki is se Allāh ke Farzand ko jalāl mile. (Yūhannā 11:4)

- *Is bīmārī kā anjām maut nahīn hai: Is se wuh kyā kahnā chāhtā thā?*

Wuh jāntā thā ki Lāzar marne wālā hai. Thoṛī der bād wuh wafāt pāegā. Lekin wuh maut ke qabze meñ nahīn rahegā. Wuh Īsā Masīh ke kahne par dubārā zindā ho jāegā.

- *Is se kis ko jalāl milegā?*

Pahle Ḵhudā Bāp ko aur dūsre us ke Farzand Īsā Masīh ko. Īsā Masīh Lāzar ko zindā karegā magar apne āpko baṛā karne ke lie nahīn. Is kām se Ḵhudā Bāp ko jalāl milegā. Is se ham ek ahm usūl sīkhte haiñ:

## **Ḵhudā ko Jalāl Do**

- *Jalāl dene kā kyā matlab hai?*

Jalāl dene kā matlab yih hai ki ham uskī izzat-o-ehtarām karen. Na sirf apnī bāton se balki apnī zindagī se bhī. Har kām jo Īsā Masīh kartā wuh islie kartā thā ki Ḳhudā Bāp ko jalāl mile. Aur kyā ajab. Jo tālluq Ḳhudā Bāp, Farzand aur Rūhul-quds ke darmiyān hai wuh bahut gahrā hai. Is yagāngat kī binā par Īsā Masīh kā har qadam, har sāns Ḳhudā Bāp kā jalāl barhāne ke lie thā.

- *Kyā āp apnī zindagī se Ḳhudā ko jalāl dete haiñ? Yā kyā āpkī zindagī ko dekhkar logon ko ghin ātī hai?*

Agar āpkā imān sachchā ho to āpkī zindagī Ḳhud baḲhud is kī gawāhī degī.

Shāgird Masīh kī yih bāt samajh na pāe. Wuh mutma'in hue. Unhon ne sochā, chalo bandā Ḳhud baḲhud ṭhik ho jāegā. Wuh rawānā na hue balki do aur din wahīn ṭhahre rahe. Phir Īsā Masīh ne farmāyā, “Āo, ham dubārā Yahūdiyā chale jāen.” Shāgird dang rah gae.

► *Wuh kyon dang rah gae?*

Wuh bole, “Ustād, abhī abhī wahān ke Yahūdī āpko sangsār karne kī koshish kar rahe the, phir bhī āp wāpas jānā chāhte haiñ?” Wuh to Yarūshalam shahr se isī lie chale gae the ki wahān ke buzurg nārāz the. Buzurg ustād ko pakarṇā chāhte the kyonki wuh nahīn mānte the ki wuh āne wālā al-Masīh hai. Sāth sāth unheñ yih ḍar thā ki kahīn is se hamārī apnī kursī hil na jāe. Kaisī bāt. Wuh sachchāi ko qabūl nahīn kar sakte the kyonki un ke lie un kī apnī izzat sab kuchh thī.

Shāgird pareshānī se ustād ko tākne lage. Tab Īsā Masīh ne unheñ ek aur bāt sikhāī. Yih ki

## **Nūr meñ Chalo**

Us ne farmāyā,

Kyā din meñ raushnī ke bārah ghanṭe nahīn hote? Jo shaḡhs din ke waqt chaltā-phirtā hai wuh kisī bhī chīz se nahīn ṭakrāegā, kyonki wuh is duniyā



kī raushnī ke zariye dekh saktā hai.  
Lekin jo rāt ke waqt chaltā hai wuh  
chīzoñ se ṭakrā jātā hai, kyonki us ke  
pās raushnī nahīn hai.  
(Yūhannā 11:9-10)

► *Jo din ke waqt chaltā hai. Din ke waqt chalne kā kyā matlab hai?*

Ab tak din kā waqt hai. Din ke waqt insān chal-phir saktā hai. Mere bāp ne din kā waqt bhī muqarrar kiyā hai aur rāt kā waqt bhī. Main duniyā kā nūr hūn. Jab tak main sāth hūn tumheñ ḍarne kī zarūrat nahīn hai.

Mere azīz, kyā āpne yih nūr pāyā hai? Jo nūr ke baḡhair chale wuh muḡhtalif chīzoñ se ṭakrātā rahtā hai. Use choṭ lagtī rahtī hai.

► *Choṭ kyon lagtī hai?*

Islie ki wuh Ḳhudā kā rāstā dekh nahīn saktā. Wuh kabhī bāīn taraf bhaṭaktā hai, kabhī dāīn taraf. Jo rāstā sīdhā abadī ārām tak le jātā hai use wuh nahīn dekhtā.

Ab Īsā Masīh ne ek tīsri bāt sikhāī:

## Apne Īmān ko Barhne Do

Us ne kahā, “Hamārā dost Lāzar so gayā hai. Lekin main jākar use jagā dūngā.”

Shāgirdon ne kahā, “Ḳhudāwand, agar wuh so rahā hai to bach jāegā.” Agar wuh ārām se so rahā ho to iskā matlab hai bīmārī ghaṭne wālī hai aur wuh ṭhīk ho jāegā. Lekin ustād ne unheñ sāf batā diyā,

Lāzar wafāt pā gayā hai. Aur tumhārī ḳhātir main ḳhush hūn ki main us ke marte waqt wahāñ nahīn thā, kyonki ab tum īmān lāoge. Āo, ham us ke pās jāeñ. (Yūhannā 11:14-15)

► *Īsā Masīh kyon ḳhush thā?*

Islie ki shāgird īmān lāenge.

► *Kyā wuh īmān nahīn lāe the?*

Zarūr. Dekheñ bāt yih hai: Jab ham īmān lāte haiñ to hamārā īmān bīj jaisā chhoṭā hotā hai. Use barhāne kī zarūrat hotī hai tāki wuh jarṭ pakre, ug āe aur barhte barhte phal lāe. Ustād

ḳhush hai ki Lāzar ke pās jāne se shāgird kā kamzor īmān mazbūt ho jāegā.

Shāyad āpke dil meñ īmān kā yih bīj ḍālā gayā hai. Kyā āp use baṛhne de rahe haiñ? Kyā āp rozānā apnī zindagī meñ us ke nūr aur uskī quwwat kā tajribā kar rahe haiñ? Agar nahīñ to use pukāreñ. Minnat kareñ ki mujhe chhū de. Mujh par apnī muhabbat aur apnī tāqat unḍel de tāki merā kamzor īmān baṛhtā jāe, mazbūt hotā jāe.

► *Kyā shāgird ḳhush the?*

Nahīñ, un ke roñgṭe khare ho gae. Lekin itnā unhoñ ne sīkh liyā thā ki ustād ke pīchhe chalnā hī hai chāhe ḳhatrā kitnā kyoñ na ho. Tomā bolā, “Chalo, ham bhī wahāñ jākar us ke sāth mar jāeñ.” Tomā yih bāt mazāq meñ nahīñ kah rahā thā. Sab jānte the ki Yarūshalam ke qarīb ānā apnī jān hathelī par rakhne ke barābar hai. Wahāñ pahuñchkar mālūm huā ki Lāzar ko qabr meñ rakhe chār din ho gae haiñ. Yih gāñw Yarūshalam ke qarīb hī thā islie bahut-se Yahūdī

Marthā aur Mariyam ko tasallī dene ke lie āe hue the. Is mauqe par īmān kā ek aur pahlū ubhar āyā:

### **Pūrā Bharosā Rakho**

Marthā ko ittalā milī ki ustād pahuñchkar bāhar intazār kar rahā hai to wuh use milne gaī. Lekin Mariyam ghar meñ baiṭhī rahī. Marthā ne kahā, “Ḳhudāwand, agar āp yahān hote to merā bhāī na martā. Lekin main jāntī hūn ki ab bhī Allāh āpko jo bhī māngeṅge degā.”

► *Ab dhyān den. Marthā ne kyā do bāteñ kahīñ?*

- Pahle, agar āp yahān hote to merā bhāī na martā.
- Lekin dūsri bāt is se baṛhkar hai. Wuh bolī, main jāntī hūn ki ab bhī Allāh āpko jo bhī māngeṅge degā. Marthā kā apne āqā par baṛā īmān hai. Wuh shikāyat nahīn kartī, kyonki ab bhī Marthā ko us par pūrā bharosā hai.

► *Marthā ko itnā pakkā bharosā kyon hai?*

Us ne pahchān liyā hai ki Ḳhudā Bāp use jo māṅgegā degā. Īsā Masīh apnī pūrī zindagī se Ḳhudā Bāp ko jalāl de rahā hai islie Ḳhudā Bāp uskī suntā hai.

Īsā Masīh ne farmāyā, “Terā bhāī jī uṭhegā.”

Marthā ne jawāb diyā, “Jī, mujhe mālūm hai ki wuh qiyāmat ke din jī uṭhegā, jab sab jī uṭheṅge.”

Tab Īsā Masīh ne ek chaunkā dene wālī bāt kahī,

Qiyāmat aur zindagī to main hūn.  
Jo mujh par imān rakhe wuh zindā  
rahegā, chāhe wuh mar bhī jāe. Aur  
jo zindā hai aur mujh par imān rakhtā  
hai wuh kabhī nahīn maregā.

(Yūhannā 11:25-26)

► *Jo imān rakhe use kyā hāsil hogā?*

Zindagī. Abadī zindagī. Matlab hai ki

### **Use Qabūl Karo jo Zindagī Hai**

► *Qiyāmat aur zindagī to main hūn. Īsā Masīh is se kyā kahnā chāhtā hai?*

Abadī zindagī usī ke zariye miltī hai. Yih kisī aur se hāsīl nahīn ho saktī. Isī lie ki ham apnī koshishoñ se jannat meñ dākḥīl nahīn ho sakte. Hamārī hālat kamzor hai. Ham jo nāpāk hain Allāh ke huzūr ā nahīn sakte. Hamārī sifārīsh karne se kuchh nahīn hotā, kyonki sifārīsh se ham pāk nahīn ho jāenge. Sifārīsh se ham wuh rūhānī hālat nahīn pāenge jis se ham mañzūr ho jāenge. Yahī wajah hai ki Īsā Masīh ne hamāre wāste apnī jān dī. Us ne apne ūpar wuh sazā lī jo hameñ uṭhānī thī. Na sirf yih balki us ke marne aur jī uṭhne ke bād us ne Rūhul-quḍs bhej diyā jo sachche īmāndār ke dil meñ rahkar use tasallī aur hidāyat detā rahtā hai. Yih chīzeñ sifārīsh se paidā nahīn hotīn.

- *Lekin iskā kyā matlab hai ki jo mujh par īmān rakhe wuh zindā rahegā? Kyā wuh is duniyā meñ nahīn maregā?*

Yahāñ do sachchāiyāñ ek dūsre ke sāth jure hue hain, ek jismānī aur dūsarī rūhānī. Jo us

par īmān rakhe wuh is duniyā meñ rahte hue yih abadī zindagī pātā hai. Kah leñ ki abadī zindagī kā bij īmāndār ke dil meñ ḍālā jātā hai. Jism kitnā ghaṭṭā aur galtā kyoñ na jāe lekin yih bīj kabhī nahīn galtā. Yih bīj baṛhtā jātā hai, rūhānī phal lātā rahtā hai aur āḅhir meñ jab jism guzar jāe īmāndār ko Ḳhudā ke huzūr le jātā hai. Yahī hai hamārī ṭhos ummīd. Yahī wajah hai ki Īsā Masīh farmātā hai ki jo zindā hai aur mujh par īmān rakhtā hai wuh kabhī nahīn maregā.

Ustād to māhir doctor hai. Us ne Marthā ke dil meñ tez nazar ḍālkar pūchhā, “Marthā, kyā tujhe is bāt kā yaqīn hai?” Use hameshā hamārī rūhānī hālat kī fikr rahtī hai.

Marthā ne jawāb diyā, “Jī Ḳhudāwand, main īmān rakhtī hūñ ki āp Ḳhudā ke Farzand Masīh haiñ, jise duniyā meñ ānā thā.”

Be-shak Marthā yih bāteñ pūre taur se nahīn samajhtī, magar dekho uskā īmān! Wuh jawāb

detī hai ki āp ẖhudā ke Farzand Masīh haiñ. Āp wuhī haiñ jise hameñ najāt dene ke lie ānā thā. Ab wuh wāpas ghar meñ khisak gai tāki chupke se Mariyam ko bulāe. Ustād ke sāth rifāqat bāqī logon se farq thī, gahrī thī. Us ke huzūr har pal qīmatī thā. Islie wuh tarāp rahī thī ki mātām karne wālon ke shor-o-ghul se dūr hokar Mariyam ke sāth apne āqā kī dhūp señke. Us ne Mariyam se kahā, ustād ā gae haiñ, wuh tujhe bulā rahe haiñ.

Mariyam ekdam uṭh kharī huī aur phurtī se gāñw se bāhar us jagah gai jahāñ Īsā Masīh abhī tak thā. Agar koī tasallī de sake to uskā āqā. Agar koī bojh halkā kar pāe to uskā āqā. Dūsre sab log yih dekhkar us ke pīchhe ho lie. Unheñ lag rahā thā ki Mariyam qabr par jā rahī hai. Īsā Masīh ko dekhte hī wuh us ke pāñwoñ meñ gir gai aur boli, “ẖhudāwand, agar āp yahāñ hote to merā bhāī na martā.” Wuh phūṭkar rone lagī. Dūsre hamdardī se sāth sāth rone lage.



Hāy, maut kitnī talḵ hai. Ek lamhe meñ insān is duniyā aur tamām azīzon se judā ho jātā hai. Na wuh rupae-paise, na jūte-kapṛe apne sāth le saktā hai. Tanhā hī wuh kūch kar jātā hai. Tab kyā hogā? Dūsri taraf us ke azīz baiṭhe ro parte haiñ. Un kā dil chhid jātā hai. Kaun yih pyārī jān wāpas lāegā? Īsā Masīh ko baṛī ranjish huī. Us ne pūchhā, tum ne use kahāñ rakhā hai?

Unhoñ ne jawāb diyā, āeñ, dekh leñ.

Tab Īsā Masīh ro paṛā.

► *Yih hamēñ us ke bāre meñ kyā sikhātā hai?*

Ham insān use itne pyāre haiñ ki wuh hamāre har dukh-sukh meñ sharīk hotā hai. Jab ham ḵhush hoñ to wuh bhī ḵhush, jab ham roeñ to wuh bhī rotā hai.

Log yih dekhkar kāfī muta'assir hue. “Dekho, wuh use kitnā azīz thā,” unhoñ ne kahā. Lekin kuchh ne kahā, “Is ādmī ne andhe ko shafā dī. Kyā yih Lāzar ko marne se nahīn bachā saktā thā?”

Tab Īsā Masīh dubārā ranjīdā hokar qabr par āyā. Yih ek ḳhās qabr thī. Ek ḡhār jis ke muñh par patthar rakhā gayā thā. Īsā Masīh bolā, “Patthar ko haṭā do.”

Marthā bolī, “Ḳhudāwand, badbū āegī, kyoñki use yahāñ pare chār din ho gae haiñ.”

Yih dekhne meñ āyā hai ki koī sab ke sāmne murdā lage magar kuchh ghanṭoñ ke bād dubārā harkateñ karne lage. Dil dharakne lagtā, sāñs chal partī hai. Yahāñ aisi koī bāt nahīñ thī. Chār din ke bād Lāzar pakkā murdā thā.

Iskā ek aur pahlū hai: Pahle Marthā to Īsā Masīh kī bāt māñ gāī thī ki wuh qiyāmat aur zindagī hai, ki wuh abadī zindagī kā sarchashmā hai. Lekin ab qabr kī nazar meñ uskā yih yaqīn māñd paṛ gayā. Kyā Īsā Masīh sachmuch Lāzar ko jilā saktā hai?

Īsā Masīh ne us se kahā, “Kyā maiñne tujhe nahīñ batāyā ki agar tū imāñ rakhe to Allāh kā jalāl dekhegī?” Tab unhoñ ne patthar ko muñh se haṭā diyā. Phir Īsā Masīh ne apñī nazar uṭhākar kahā,

“Ai bāp, main terā shukr kartā hūn ki tūne merī sun lī hai. Main to jāntā hūn ki tū hameshā merī suntā hai. Lekin mainne yih bāt pās kharē logoñ kī k̄hātir kī, tāki wuh īmān lāeñ ki tūne mujhe bhejā hai.” Phir wuh zor se pukār uṭhā, “Lāzar, nikal ā!”

► *Phir kyā huā?*

Murdā nikal āyā. Abhī tak us ke hāth aur pānw paṭṭiyon se bandhe hue the jabki uskā chehrā kapre meñ liptā huā thā. Īsā Masīh ne un se kahā, “Is ke kafan ko kholkar ise jāne do.”

Lāzar kī bahneñ kitnī k̄hush huī hoñgī! Un kā bhāi maut kī duniyā se wāpas ā gayā thā!

Is pūre silsile se ham ek markazī bāt sīkhte haiñ.

► *Kyā sīkhte haiñ?*

Yih ki Īsā Masīh zindagī kā mañbā hai. Wuhī jī uṭhne kā wasīlā hai. Shāyad Lāzar būṛhā ho gayā. To bhī use dubārā marnā hī thā. Lekin Lāzar ke andar abadī zindagī kā wuh bij thā jo Īsā Masīh ne us meñ ḍāl diyā thā. Is duniyā se

kūch kar jāne ke bād yih bīj use uṭhākar us ke āqā ke pās le gayā.

- *Kyā āpko yih ummīd hai? Kyā yih bīj āpke andar hai? Kyā āp pakke jānte haiñ ki yih bīj āpko marne ke bād Īsā Masīh kī god meñ le jāegā jahāñ āp is duniyā kī tag-o-do se āzād hokar sukūn aur itmīnān se baseñge?*

Ek ākhirī pahlū hai jis par hameñ dhyān denā hai: Yih kām dekhkar sab kḥush na hue. Kuchh us ke kḥilāf hue. Āie ham dekheñ

### **Inkār Karne Wāloñ kā Jawāb**

Yih mojizā dekhkar bahut-se log Īsā Masīh par imān lāe. Matlab hai wuh mān gae ki yahī najāt dene wālā al-Masīh hai. Koī aur aisā mojizā nahīn kar saktā. Lekin kuchh ne buzurgoñ ke pās jākar unheñ ittalā dī ki kyā huā hai.

- *Kyā buzurg kḥush hue ki aisā mojizā huā hai?*

Nahīñ. Wuh āpas meñ kahne lage, “Ham kyā kar rahe haiñ? Yih ādmī bahut-se ilāhī nishān dikhā rahā hai. Agar ham use khulā

chhoṛeñ to āḳhirkār sab us par īmān le āeñge. Phir Romī ākar hamāre Baitul-muqaddas aur hamāre mulk ko tabāh kar deñge.”

► *Yih log kyon khush nahin the?*

Unheñ koī parwā nahīñ thī ki mojizā huā hai. Unheñ sirf yih fikr thī ki hamārī izzat kam ho jāegī. Wuh to Romī sarkārī officeroñ ke sāth mile-jule the. Log Īsā Masīh kā iḳhtiyār māneñ to ho saktā hai ki Romī sarkār nārāz hokar Baitul-muqaddas aur mulk ko nest-o-nābūd karen.

Tab imām-e-āzm bol uṭhā. Uskā nām Kāyfa thā. Us ne kahā, “Āp kuchh nahīñ samajhte aur iskā ḳhyāl bhī nahīñ karte ki is se pahle ki pūrī qaum halāk ho jāe behtar yih hai ki ek ādmī ummat ke lie mar jāe.”

Uskā matlab thā ki Īsā Masīh ko ḳhatm karnā chāhie, is se pahle ki pūrā mulk ḳhatm ho jāe. Lekin haqīqat meñ Ḳhudā us ke wasīle se peshgoī kar rahā thā. Īsā Masīh un sab ke lie maregā jo us

par īmān lāenḡe, Yahūdiyōn ke lie bhī aur dūsron ke lie bhī.

Us din se wuh pakke irāde ke sāth Īsā Masīh ko qatl karne kī sāzishēn karne lage. Kitnī ajīb bāt! Ek taraf Īsā Masīh ne ek murde ko zindagī dī. Dūsri taraf log yih dekhkar use maut ke ghāṭ utārne kī sāzishēn karne lage. Ek taraf abadī zindagī kī khulī dāwat, dūsri taraf qatl-o-ghārat kā pakkā irādā. Ek taraf apnī jān dene kī taiyārī, dūsri taraf apnī kursī mazbūt karne kī siyāsat.

► *Sawāl yih hai: Āp Īsā Masīh ke bāre meṅ kyā sochte haiṅ?*

Shāyad āp māneṅ ki Īsā Masīh achchhā insān hai. Yih kāfī nahīn hai. Is se āpko abadī zindagī nahīn milegī. Sachche īmān kī zarūrat hai. Wuh īmān jo apnī zindagī se Ḳhudā ko jalāl dekar nūr meṅ chaltā hai. Aisā īmān baṛhtā rahtā hai, apne āqā par pūrā bharosā rakhtā hai. Sab se baṛhkar yih ki wuh abadī zindagī kā bīj apne andar pātā hai. Wuh abadī zindagī jo sirf Īsā Masīh de saktā hai.

## **Injil, Yūhannā 11,1-54**

### **Lāzar kī Maut**

Un dinon mein ek admī bimār par gayā jis kā nām Lāzar thā. Wuh apnī bahnon Mariyam aur Marthā ke sāth Bait-aniyāh mein rahtā thā. Yih wuhī Mariyam thī jis ne bād mein Kḥudāwand par kḥushbū unḍelkar us ke pānw apne bālon se kḥushk kie the. Usī kā bhāi Lāzar bimār thā. Chunnānche bahnon ne Īsā ko ittalā dī, “Kḥudāwand, jise āp pyār karte haiñ wuh bimār hai.”

Jab Īsā ko yih kḥabir milī to us ne kahā, “Is bimārī kā anjām maut nahīñ hai, balki yih Allāh ke jalāl ke wāste huā hai, tāki is se Allāh ke Farzand ko jalāl mile.”

Īsā Marthā, Mariyam aur Lāzar se muhabbat rakhtā thā. To bhī wuh Lāzar ke bāre mein ittalā milne ke bād do din aur wahīñ ṭhahrā.

Phir us ne apne shāgirdoñ se bāt kī, “Āo, ham dubārā Yahūdiyā chale jāeñ.”

Shāgirdoñ ne etarāz kiyā, “Ustād, abhī abhī wahāñ ke Yahūdī āpko sangsār karne kī koshish kar rahe the, phir bhī āp wāpas jānā chāhte haiñ?”

Īsā ne jawāb diyā, “Kyā din meñ raushnī ke bārah ghanṭe nahīñ hote? Jo shaḡhs din ke waqt chaltā-phirtā hai wuh kisī bhī chīz se nahīñ ṭakrāegā, kyonki wuh is duniyā kī raushnī ke zariye dekh saktā hai. Lekin jo rāt ke waqt chaltā hai wuh chīzoñ se ṭakrā jātā hai, kyonki us ke pās raushnī nahīñ hai.” Phir us ne kahā, “Hamārā dost Lāzar so gayā hai. Lekin main jākar use jagā dūngā.”

Shāgirdoñ ne kahā, “Ḳhudāwand, agar wuh so rahā hai to wuh bach jāegā.”

Un kā ḡhyāl thā ki Īsā Lāzar kī fitrī nīnd kā zikr kar rahā hai jabki haqīqat meñ wuh uskī maut kī taraf ishārā kar rahā thā. Islie us ne unheñ



sāf batā diyā, “Lāzar wafāt pā gayā hai. Aur tumhārī ḡhātir main ḡhush hūn ki main us ke marte waqt wahān nahīn thā, kyonki ab tum īmān lāoge. Āo, ham us ke pās jāen.”

Tomā ne jis kā laqab juḡwān thā apne sāthī shāgirdon se kahā, “Chalo, ham bhī wahān jākar us ke sāth mar jāen.”

### **Īsā Qiyāmat aur Zindagī Hai**

Wahān pahuñchkar Īsā ko mālūm huā ki Lāzar ko qabr meñ rakhe chār din ho gae haiñ. Baitaniyāh kā Yarūshalam se fāslā tīn kilometer se kam thā, aur bahut-se Yahūdī Marthā aur Mariyam ko un ke bhāī ke bāre meñ tasallī dene ke lie āe hue the.

Yih sunkar ki Īsā ā rahā hai Marthā use milne gāi. Lekin Mariyam ghar meñ baiṡhī rahī. Marthā ne kahā, “ḡhudāwand, agar āp yahān hote to merā bhāī na martā. Lekin main jāntī

hūn ki ab bhī Allāh āpko jo bhī māngege degā.”

Īsā ne use batāyā, “Terā bhāi jī uṭhegā.”

Marthā ne jawāb diyā, “Jī, mujhe mālūm hai ki wuh qiyāmat ke din jī uṭhegā, jab sab jī uṭhege.”

Īsā ne use batāyā, “Qiyāmat aur zindagī to main hūn. Jo mujh par īmān rakhe wuh zindā rahegā, chāhe wuh mar bhī jāe. Aur jo zindā hai aur mujh par īmān rakhtā hai wuh kabhī nahīn maregā. Marthā, kyā tujhe is bāt kā yaqīn hai?”

Marthā ne jawāb diyā, “Jī Ḳhudāwand, main īmān rakhtī hūn ki āp Ḳhudā ke Farzand Masīh haiñ, jise duniyā meñ ānā thā.”

### **Īsā Rotā Hai**

Yih kahkar Marthā wāpas chalī gāi aur chupke se Mariyam ko bulāyā, “Ustād ā gae haiñ, wuh tujhe bulā rahe haiñ.” Yih sunte hī

Mariyam uṭhkar Īsā ke pās gaī. Wuh abhī gānw ke bāhar usī jagah ṭhahrā thā jahān uskī mulāqāt Marthā se huī thī. Jo Yahūdī ghar meñ Mariyam ke sāth baiṭhe use tasallī de rahe the, jab unhoñ ne dekhā ki wuh jaldī se uṭhkar nikal gaī hai to wuh us ke pīchhe ho lie. Kyonki wuh samajh rahe the ki wuh mātam karne ke lie apne bhāī kī qabr par jā rahī hai. Mariyam Īsā ke pās pahuñch gaī. Use dekhte hī wuh us ke pānwon meñ gir gaī aur kahne lagī, “Ḳhudāwand, agar āp yahān hote to merā bhāī na martā.”

Jab Īsā ne Mariyam aur us ke sāthiyon ko rote dekhā to use baṛī ranjish huī. Muztarib hālat meñ us ne pūchhā, “Tum ne use kahān rakhā hai?”

Unhoñ ne jawāb diyā, “Āeñ Ḳhudāwand, aur dekh leñ.”

Īsā ro paṛā. Yahūdīyon ne kahā, “Dekho, wuh use kitnā azīz thā.”

Lekin un meñ se bāz ne kahā, “Is ādmī ne andhe ko shafā dī. Kyā yih Lāzar ko marne se nahīn bachā saktā thā?”

### **Lāzar ko Zindā Kar Diyā Jātā Hai**

Phir Īsā dubārā nihāyat ranjīdā hokar qabr par āyā. Qabr ek ghār thī jis ke muñh par patthar rakhā gayā thā. Īsā ne kahā, “Patthar ko haṭā do.”

Lekin marhūm kī bahn Marthā ne etarāz kiyā, “Ḳhudāwand, badbū āegī, kyoñki use yahāñ paṛe chār din ho gae haiñ.”

Īsā ne us se kahā, “Kyā mainne tujhe nahīn batāyā ki agar tū imān rakhe to Allāh kā jalāl dekhegī?” Chunāñche unhoñ ne patthar ko haṭā diyā. Phir Īsā ne apnī nazar uṭhākar kahā, “Ai bāp, main terā shukr kartā hūñ ki tūne merī sun lī hai. Main to jāntā hūñ ki tū hameshā merī suntā hai. Lekin mainne yih bāt pās khare logoñ kī khātir kī, tāki wuh imān

lāeñ ki tūne mujhe bhejā hai.” Phir Īsā zor se pukār uṭhā, “Lāzar, nikal ā!” Aur murdā nikal āyā. Abhī tak us ke hāth aur pānw paṭṭiyon se bandhe hue the jabki uskā chehrā kapṛe meñ liptā huā thā. Īsā ne un se kahā, “Is ke kafan ko kholkar ise jāne do.”

### **Īsā ke Ḳhilāf Mansūbābandī**

Un Yahūdīyon meñ se jo Mariyam ke pās āe the bahut-se Īsā par imān lāe jab unhoñ ne wuh dekhā jo us ne kiyā. Lekin bāz Farīsiyon ke pās gae aur unheñ batāyā ki Īsā ne kyā kiyā hai. Tab rāhnumā imāmoñ aur Farīsiyon ne Yahūdī adālat-e-āliyā kā ijlās munaqid kiyā. Unhoñ ne ek dūsre se pūchhā, “Ham kyā kar rahe haiñ? Yih ādmī bahut-se ilāhī nishān dikhā rahā hai. Agar ham use khulā chhoṛeñ to āḳhirkār sab us par imān le āenge. Phir Romī ākar hamāre Baitul-muqaddas aur hamāre mulk ko tabāh kar denge.”

Un meñ se ek Kāyfā thā jo us sāl imām-e-āzm thā. Us ne kahā, “Āp kuchh nahīn samajhte aur iskā ḳhyāl bhī nahīn karte ki is se pahle ki pūrī qaum halāk ho jāe behtar yih hai ki ek ādmī ummat ke lie mar jāe.” Us ne yih bāt apnī taraf se nahīn kī thī. Us sāl ke imām-e-āzm kī haisiyat se hī us ne yih peshgoī kī ki Īsā Yahūdī qaum ke lie maregā. Aur na sirf is ke lie balki Allāh ke bikhre hue farzandoñ ko jamā karke ek karne ke lie bhī.

Us din se unhoñ ne Īsā ko qatl karne kā irādā kar liyā. Islie us ne ab se alāniyā Yahūdiyoñ ke darmiyān waqt na guzārā, balki us jagah ko chhoṛkar registān ke qarīb ek ilāqe meñ gayā. Wahāñ wuh apne shāgirdoñ samet ek gāñw banām Ifrāīm meñ rahne lagā.